

皇清經解續編

皇清經解集編

自序

緬惟端門化帛嬴秦肆破術之謠祕室談經漢氏開獻書之路  
時則意存罔括志切蒐羅下幣詔于平津坐安輪于申傅是以  
河閒真本競出民間東魯佚編閒來壁下然而詩則魯韓各授  
書則今古攸區禮溯后蒼慶戴遞傳其緒樂原制氏常山竟絕  
其傳向歆則父子殊歸毛孟則師生異讀源其授受本異參商  
稽厥指歸殊淆黑白班氏位參元武生值東京待詔金馬之門  
珥筆白虎之觀臚羣言之同異衷師說之是非立學官者十有  
四家著藝略者三十八種棗經故訓雜出西州蝌字佚文仍遺  
東觀雖一尊之定說未伸而六藝之微言斯在今欲疏其指受  
證厥源由暢隱抉微有四難焉蓋以石渠典佚天祿圖湮汝南

存異義之名中郎蝕熹平之舊董曹兵燹劉石憑陵南國清談  
欽崇元妙北郊戎馬滅絕典墳重以妄生異義橫裂聖經高才  
者蔗肆雌黃末學者蜿求青紫而欲溯微文于旣汨尋佚論于  
久湮紹彼先民暢茲墜緒其難一也至若緯著七篇讖傳百首  
鑿度運樞之說推災考耀之文敘郊邱則旁徹禮經論始際則  
隱符風雅辨殷周文質而春秋義昭剖卦象盈虛而易爻指晰  
雖雜以占候未底于醇而徵諸遺經閒合乎契故皆以讖斷禮  
以緯儷經內學之稱諒非徒爾迄乎莊老橫流康壺自寶僭僞  
謬託贗鼎雜陳遂禁絕于天監之年燔滅于開皇之世華容著  
錄片羽僅存候官集遺塵珠略見而欲旁搜星緯遠索苞符求  
鄭宋之絕學述曹史之元經其難二也昔班氏之入此觀也習

魯詩者首重魯恭肆歐陽者并崇桓郁景伯則專精古義丁鴻則兼習今經共述師承咸資採析今則淳于之奏莫考舊聞臨制之章無由資溯師守之源流莫覩專門之姓氏誰尋而欲綜七略之遺文匯百家之異旨津逮殊迷淵源何自其難三也況其舊入祕書久同佚典毛公古義莫遇司農楊子元文誰爲沛國是以魯魚互錯亥豕交差同酒誥之俄空若冬官之闕略雖餘姚校正略可成書武進補遺差堪縷述然亦終非全璧祇錄羽琕而欲披精論于殘編掇微旨于墜簡其難四也立質賦顯愚學慚俗陋恥鄉壁之虛造守先儒之舊聞不揣禱昧爲之疏證凡十二卷祇取疏通無資辨難訪冲遠作疏之例依河閒述義之條析其滯疑通其結轡集專家之成說廣如綫之師傳口

傳耳剽固未究其枝葉管窺莛擊或有補于涓埃云爾

道光壬辰九月旣望句容陳立謨于揚州寓宅之惜分軒

皇清經解續編卷千二百六十五

南菁書院

白虎通疏證一

句容陳立卓人著

爵

天子者爵稱也

此易說春秋今文說也周易乾鑿度云易有君人五號帝者天稱也王者美行也天子者爵號

也大君者與興上行異也大人者聖明德備也曲禮疏引五經異義云天子有爵不易孟京說易有君人五號帝天稱一也說與乾鑿度文同是天子有爵古周禮說天子無爵同號于天何爵之有謹案春秋左氏云施于夷狄稱天子施于諸夏稱天王施于京師稱王知天子非爵稱也從古周禮說鄭駁之云案士冠禮古者生無爵死無諡自周及漢天子有爵此有爵甚明云無爵失之矣是鄭氏以天子為爵稱也初學記引尚書刑德放亦云天子爵稱也兩漢之世易孟京春秋公羊立于學官古周禮古左氏尚未盛行故與白虎通多異也案孟子序班爵之制云天子一位公一位侯一位伯一位子男同一位以天子與五等之爵並稱安見天子非爵也顧氏炎武日知錄云為民而立之君故班爵之意天子與公侯伯子男一也而非絕世之貴代耕而賦之祿故班祿之意君卿大夫士與庶人在官一也而非無事之食是故知天子一

位之意則不敢肆于民上以自尊知祿以代耕之意則不敢  
厚取于民以自奉不明乎此而侮奪人之君常多于三代以  
下矣而禮記王制云王者制祿爵公侯伯子男凡五等者蓋  
以王者之制言之則不數天子以作君作師之義言之則天  
子亦儕乎爵所以稱天子何王者父天母地爲天之子也乾  
公侯也鑿度云天子者繼天理物改一統各得其宜父天母地以養萬  
民至尊之號也後漢書注引感精符云人主日月同明四時  
合信故父天母地兄日姊月宋注父天子圜丘之祀也母地  
于方澤之祭也董子繁露三代改制篇天佑而子者號稱天  
子故聖人生則稱天子蔡邕獨斷云父天母地故稱天子太  
平御覽引應劭漢官儀云號曰皇帝道舉措審諦父天母地  
爲天下主詩時邁云昊天其子之鄭箋天其子愛之何氏公  
羊成公八年傳注聖人受命皆天所生謂之天子御覽引保  
乾圖云天子至尊也神精與天地通血氣含五帝精故援神  
天愛之子之也後漢李固傳云王者父天母地是也

契曰天覆地載謂之天子上法斗極鉤命決曰天子爵稱也

援神契鉤命決皆孝經緯篇名說苑修文篇天覆地載謂之  
天子御覽引佐助期亦云天子法斗諸侯應宿皆與孝經緯  
說同也帝王之德有優劣所以俱稱天子者何獨斷云上古天子庖羲氏神農

氏稱皇堯舜稱帝殷周稱王稱謂不同明德有優劣也御覽  
引斗威儀云帝者得其英華王者得其根核霸者得其附支  
意林引新論云三皇以道治五帝以德化三王由仁義五霸  
用權智阮籍通考論三皇依道五帝仗德三王施仁五霸行  
義強國任智蓋優劣  
之異厚薄之降也 以其俱命于天 古微書春秋緯演孔圖  
云天子皆五氣之精寶

各有題序以次運相據起必有神靈符紀諸神扶助使開階  
立遂是以王者嘗置圖錄坐旁以自立也毛詩序云文王受  
命作周也箋云受命者受天命而王天下也詩疏引鄭氏六  
藝論云太平嘉瑞圖書之出必龜龍銜負焉黃帝堯舜周公  
是其正也若禹觀河見長人皋陶于洛見黑公湯登堯臺見  
黑烏至武王渡河白魚躍文王赤雀止于戶秦穆公白雀集  
于車是其變也故緯候皆載帝王受命之事詩疏引春秋元  
命苞云鳳皇銜圖置帝前黃帝再拜受古微書元命苞云堯  
游河渚赤龍負圖以出路史注引尚書中候考河命曰若稽  
古帝舜曰重華欽翼皇象鄭注言敬奉皇天之歷數御覽引  
中候握河紀云伯禹在庶四岳師舉薦之帝堯帝曰何斯若  
真出爾命圖示乃天文又引中候洛子命云天乙東觀于洛  
降三分璧沈于洛水退立榮光不起黃魚雙躍出濟于壇黑  
鳥以雄隨魚亦至正化爲黑玉赤勒曰元精天乙受神福伐  
桀克三年天下悉合詩疏引中候稷起篇云堯受河圖洛書  
后稷有名錄苗裔當王是黃帝堯舜夏商周受命于天事也

而王治五千里內也

此今文尚書說也王制疏引五經異義云今尚書歐陽說中國方五千里古尚

書說五服旁五千里相距萬里謹案以今漢地考之自黑水至東海衡山之陽至于朔方經略萬里鄭無駁與許同則許

鄭并用古文尚書也易繫辭下云陽一君而二民君子之道也陰二君而一民小人之道也王制疏引鄭注云一君二民

謂黃帝堯舜地方萬里為方千里者百中國之民居七千里七七四十九方千里者四十九夷狄之民居千里者五十一

是中國夷狄二民共事一君二君一民謂三代之末以地方五千里一君有五千里之土五五二十五更足以君二十五

始滿方千里之方五十乃當堯舜一民之地故云二君一民實無此二君一民假之以地廣狹為優劣也鄭氏注易時以

三代方五千里五帝時方萬里與今古尚書文并不合白虎通于易書詩禮春秋多用今文說于古文說間及之此用今

文尚書說御覽引孫子云夫帝王處四海之內居五千里之中亦與今尚書同也

父母以爲天下王

周書洪範文引以證天子治天下之義也御覽引伏生大傳云聖人者民之父母也

母能生之能養之父能教之能誨之聖人曲備之者也能生之能食能教誨之也為之城郭以居之為之宮室以處之為

之庠序之學以教誨之為之列地制畝以飲食之何以知帝故書曰天子作民父母以為天下王此之謂也

亦稱天子以法天下也中候曰天子臣放勳御覽引中候運

壁率羣臣東沈于洛書曰天子臣放勳德薄施行不元鄭注

元善也放勳即堯典之放勳說文力部勳古文作勳又彳部

徂字下引勳乃徂蓋孔壁之古文周禮司勳注故書勳作勳

是勳乃古文書也案曲禮上云君前臣名據中候言堯告天

自稱放勳則放勳者堯名也閻氏若璩四書釋地又續云古

帝王有名有號如堯舜禹其名也放勳重華文命皆其號也

非史臣之贊詞江氏聲尚書集注音疏云大戴帝系篇云少

典產軒轅是為黃帝又昌意產高陽是為帝顓頊又矯極產

高辛是為帝嚳帝嚳產放勳是為帝堯是放勳與軒轅同稱

也漢書古今人表云黃帝軒轅氏帝顓頊高陽氏左傳亦稱

高陽氏高辛氏軒轅高陽等既皆是氏則放勳當同案史記

五帝本紀云黃帝者名曰軒轅虞舜者名曰重華以重華軒

轅論之則堯亦當名放勳矣果如江氏據大戴禮為信則當

以堯舜等為名然則黃帝亦為名乎蓋古時尚質名號通稱

淮南子原道訓則名實同居高注勢位爵號之名也周書諡

法解大行受大名細行受細名注名謂號諡故孟子滕文公

注又以放勳為號于萬章書山逸篇曰厥兆天子爵本俱无

字山字當是衍文案漢初伏生口傳二十八篇作書傳四十

九篇後有歐陽大小夏侯并傳其學三家立于學官訖漢東

京相傳不絕是爲今文尙書漢武帝時魯恭王壞孔子宅得古文孔安國以今文讀之增多得二十四篇遭巫蠱事未得立于學官爲中古文劉向父子校理祕書皆見之後漢賈徽父子孔僖衛宏徐巡馬融鄭康成并傳其學又兼通杜林漆書是爲古文尙書然孔壁之二十四篇馬融謂絕無師說漢人重師承無師說不敢強爲之解故東京之習古文尙書者亦第解伏生之二十八篇及河內女子所得之泰誓一篇耳其餘皆未之注釋故又稱逸書至二十九篇及二十四篇以外則謂之亡者并其文字盡亡之也逸者但逸其說也然則此所引逸篇當是孔壁之古文也董豐垣輯書大傳以此句收入無佚篇蓋未考耳且無佚周書白何以皇亦稱天子虎通引以證帝亦稱天子其非周書可知

也以其言天覆地載俱王天下也故易曰伏羲氏之王天下

也繫辭傳下文也今王弼本作庖羲氏集解引虞翻本亦作庖犧又引鄭注本作包犧與此不同惟易釋文引孟喜古

文易本作伏戲氏之王天下也注伏服也戲化也又引京房章句本與孟氏同考京氏本從梁人焦延壽學易延壽常從孟喜問易喜死房以延壽易卽孟氏學故京氏說易多與孟氏同先儒以孟京并稱此之故也白虎通蓋引用京孟本也

右論天子爲爵稱

舊無細目今依盧本

爵有五等以法五行也或三等者法三光也或法三光或法五

行何質家者據天故法三光文家者據地故法五行公羊桓

注云質家爵三等者法天之有三光也文家爵五等者法地之有五行也王制疏引元命苞云周爵五等法五精春秋三等法三光注五精是總法五行分之則法五剛諸侯之臣則法五柔公羊疏引元命苞又云質家爵三等者法天之有三光也文家爵五等者法地之有五行也鄭注王制亦云象五行剛柔十日公羊家以春秋變周之文從殷之質故春秋緯以春秋為質家也然則白虎通亦用今文春秋說也漢書袁盎傳殷道質質者法天周道文文者法地是質者據天文者法地  
含文嘉曰殷爵三等周爵五等各有宜也禮緯篇名也

含文嘉又曰質以天德文以地德殷授天而王周據地而正王制疏引含文嘉又云殷爵三等殷正尚白白者兼中正故三等夏尚黑亦從三等若然夏亦尚文而爵三等者文家五等質家三等是春秋家說不可通之于禮說也且五等之爵至周始備故下引王制五等之制為周制則夏世不得有五等矣繁露三代改制篇周爵五等春秋三等春秋何三等曰王制以制一商一夏一質一文商質者主王制曰王者之制天夏文者主地春秋者主人故三等也

祿爵凡五等謂公侯伯子男也此據周制也

王制曰王者之制祿爵公侯伯

子男凡五等此則以公侯伯子男五字爲白虎通釋王制之

詞與本經不同者白虎通引書多與本經異或所引不全或

見本不同或寫字有訛也知據周制者以春秋緯及公羊家

皆以殷爵三等又禮緯言夏爵亦三等故以五等爲周制也

據字舊脫盧依御

春秋傳曰天子三公稱公王者之後稱公

其餘大國稱侯小者伯子男也

公羊隱五年傳文也天子三公稱公者僖九年經公會宰

周公是也注宰治也三公之職號尊名也王者之後稱公者

隱三年經書宋公和卒注宋稱公殷後也王者封二王後地

方百里爵稱公客待之不臣也若然春秋黜杞新周而故宋以

公羊莊二十七年杞伯來朝注云春秋黜杞新周而故宋以

春秋當新王則公羊家等周于二王之後故杞不稱公也若

左氏家杜預等以杞與滕辭并爲時王所黜與公羊不同其

餘大國稱侯小者伯子男者彼注云大國謂百里也小國謂

伯七十里子男五十里鄭氏王制注云春秋變周之文從殷

之質合伯子男以爲一則殷爵三等者公侯伯而子男則上

統于伯并爲小國也王制疏引鄭志云張逸問殷爵三等公

侯伯尚書有微子箕子何答曰微子箕子實是圻內采地之

爵非圻外治民之君故云子也然則殷之世惟圻內得有子

男之爵也舊脫天子三公句又其餘下閒以人皆千乘象  
雷震百里所潤同十二字今依盧以隱五年傳文為定王

制曰公侯田方百里伯七十里子男五十里孟子萬章下天

里公侯皆方百里伯七十里子男五十里凡四等注凡此四

等皆土地之等差也此以公侯為一等伯為一等子男為一

先儒以為夏制也所以名之為公侯者何公者通也公正無

私之意也公羊疏引元命苞云公之言公公公正無私古公通

其展轉相訓又釋名云公廣也惟廣故能通淮南原道訓此

俗氏庸民之所公見也謂通見也修務訓何以為公論謂通

論也荀子解蔽篇此心術之公患也謂通患也私說文作人

云奸衰也韓非曰蒼頡造字自營為人于公字下注云入猶

背也韓非曰背人為公左傳疏引環濟要略云自營為侯者

人八人為公廣雅釋詁云公正也是公正無私之意也侯者

侯也侯逆順也公羊疏引元命苞云侯之言侯侯逆順兼伺  
職方氏其外方五百里謂之侯服注侯為王者斥侯也廣雅  
釋言侯侯也侯侯同音周禮小祝云侯禳禱祈之祝號注侯  
之言侯也是也說文侯春饗所射侯以射義云射中則得為  
諸侯故引伸為諸侯之侯字至侯逆順之侯則人部云侯司

望也是也所以名之以下至此人皆千乘禮坊記云故制國不過千乘注古者

舊在春秋傳曰上依盧校正

方十里其中六十四井出兵車一乘此兵賦之法也成國之

賦千乘疏引司馬法云成方十里出革車一乘司馬法又云

甸方八里出長轂一乘鄭注小司徒云若通溝洫之地則爲

十里若除溝洫之地則爲八里也又鄭注小司徒云井十爲

通上一人徒二人通十爲成革車一乘士十人徒二十人十

成爲終革車十乘士百人徒二百人十終爲同革車百乘士

千人徒二千人則千乘之國適得士萬人徒二萬人與魯頌

公車千乘公徒三萬合漢書刑法志因井田而制軍賦地方

一里爲井井十爲通通十爲成成方十里成十爲終終十爲

同同方百里同十爲封封十爲圻圻方千里有稅有賦稅以

足食賦以足兵故四井爲邑四邑爲邱邱十六井也戎馬一

匹牛三頭四邱爲甸甸六十四井也有戎馬四匹兵車一乘

牛十二頭甲士三百人步卒七十二人干戈備具是爲乘馬之

法一同百里提封萬井除山林沈斥城池邑居園圍術路三

千六百井定出賦六千四百井戎馬四百匹兵車百乘此卿

大夫采地之大者也是爲百乘之家一封三百三十六里提封

十萬井定出賦六萬四千井戎馬四千匹兵車千乘此諸侯

之大者也是爲千乘之國天子圻外千里提封百萬井定出

賦六十四萬井戎馬四萬匹兵車萬乘故稱萬乘之主論語

學而道千乘之國何晏集解引馬融注云司馬法步百爲畝

畝百爲夫三爲屋屋三爲井井十爲通通十爲成成出兵  
車一乘然則千乘之賦其地千成居地方三百十六里惟公  
侯之封乃能容之又引包咸注云千乘之國者百里之國也  
古者井田方里而井井十爲乘百里之國適千乘也宣十五  
年公羊注聖人制井田之法十井共出兵車一乘與包氏說  
同杜預注左傳謂周禮九夫爲井四井爲邑四邑爲邱四邱  
爲甸甸六十四井出車一乘案以開方計之方百里者爲方  
百里者百則爲一萬井之地考以杜氏之說則六十四井出  
一乘六千四百井出百乘萬井之中三分去一止得六千四  
百井但能出百乘耳刑法志及馬融之說并謂千乘須得方  
十萬里與杜說同也惟何休包咸之說則以一萬井正得千  
乘然使十井出一甸之賦則其虐又甚于邱甲矣馬氏等據  
周禮包氏等據王制依周禮則百里千乘之制不合依王制  
則百里出千乘又嫌于非情而說多以千乘爲三百一十六  
里故并錄  
象雷震百里所潤同  
御覽引援神契曰二王之後  
存之焉

震百里所潤雲雨同易蠱不事王侯集解引虞注震爲諸侯易震云震亨詩疏引  
象上傳親諸侯集解引虞注震爲諸侯易震云震亨詩疏引  
鄭注云震爲雷雷動物之氣也雷之發聲猶人君出政教之  
以動國中之人也故謂之震又云震驚百里不喪七鬯儀禮  
疏引鄭注云雷發聲聞于百里古者諸侯之象諸侯之出教  
令能警戒其國疆之內則守其宗廟社稷爲之祭主不亾其